

Tito Paulõ kene bumanikiaki

TITO

Paulõ Titokiri xinānikiaki, na hātcharā

1 ¹Titoõ, ẽ mia kene bumai uĩrawe. Ea ẽ Paulorā, Deusũ hawẽ tsuma ea wakĩ Jesus Cristõ kuxipaya ea waniki. Habiaturĩ ea yunukĩ tsuabura hakiri txanima hātxa nũ hatu ikũwāmashanai habu Deusũ katuni habũ hau tapĩkĩ hau unāti wakubaiwashanũbũ haska besti txibātikiri ẽ mia yuiaii. ²Deus txani txakaismatũ mai damiwariama hawẽ hātshawẽ hiweakiri yubakani hatũ hiwea ikibi ika tsumatũ hawa betsa wama ishanai nũ manaii. ³Natiā hanu ma menekĩ hanu ati wani anu hawẽ bakekiri kakape nũ unāshanũbũ nukũ Epa Deus mekenātũ nuku unāmani haska wanishũ eki txiti ikaya hawẽ yunuawẽ hawẽ hātxa ẽ hatu tapĩmakubainaii. ⁴Titoõ, txanima ebetā ikũwaĩ mĩ ẽ bake kayabi keskaki. Nukũ Shanẽ Ibu Jesus Cristo hawẽ Epa Deusbe miwẽ nuikĩ mia unānuma hiwemakĩ hau mia duawakubainũbũwẽ.

Haska wakĩ mekenikabu katutikiri Tito yusĩnikiaki, na hātcharā

⁵Natukā Creta anua nũ dayai taeima anushũ hatu merabewakĩ pewakĩ mae tibi anushũ ikũwaĩbu mekenikabu wakĩ mĩ hatu katunũ haska xinākĩ mia yunutā ẽ mia henebiranimaki. ⁶Mekenika katukinā, eska hiweabu hatu unākĩ uĩtā akubaĩwẽ. Tsuā hatukiri txakabu yuisma inũ, aĩyākatsi ikĩ aĩbu bitā heneisma betsawẽ kemuisma inũ, hawẽ bakebu habetā Jesus Cristo ikũwaĩbu hawẽ bakebu hawa metimakĩ hatu uĩmai hatuki ha imaisbuma ha hawẽ bakebu huĩti kuxi sinatapaishumakẽ mĩ hatu katushũtiruki. ⁷Ha daya pepa ikatsi ikĩ hatu bebushunũbũ mĩ hatu katutirurā, bebukĩ Deusũ enabu hatu mekemakatsi ikĩ haska tibi Deusũ abuai akatsi ikaiibu hatu katukĩ yunukinā, hatũ hiwea hawa txakabu hayama pe besti ikubainaibu hatu akubaĩwẽ. Hatũ xinā betsa maewatirubuma akama inũ, sina besu akama inũ, paẽkatsis imisbu inũ, hātshawẽ hatu bekũyā amisbu inũ, hatu beparātā hatũ pei inũ hatũ

mabu ibubis binumatã pei itxawamis haskabu uĩtã katutumaki. ⁸Eskabu mĩ hatu atiruki. Nĩkawe, bai mapuabu inũ ikũwaĩbu beaibu hatu itã duawamisbu inũ, hawara pepa besti ikaibu abumisbu inũ, hawara ariama pe xinãmisbu inũ, hawara hãtxatã kanekatsi isbuma inũ, duapai Deuski datemisbu inũ, hatũ hiwea pe mekekubaĩmisburã. ⁹Haskamisbuwẽ taeshũ ikũwaĩ betsaburi merabewakĩ hatu benimawakĩ yusĩa pepawẽ hatu ikũwãmakĩ habũ hamakiri xinã txakaibu hatu merabewatirubuki. Hatu haska wakĩ Jesus Cristokiri txanima hãtxa nũ hatu yusĩmis ikũwãkĩ betsa tibi xinãma nukũ yusĩa hau txibãriakubainũbũwẽ.

Yusĩnanã beparamemisbukiri Tito xinãmanikiaki, na hãtxarã

¹⁰Creta anuabu huĩti kuxi hãtxa nĩkaisbuma mirimabuki. Habũ judeubũ beya txibaĩ yusĩnã pepanikapaikĩ hatu parãkĩ hãtxa kayabiwẽ ikama hawẽ haskatima kaya hatu yusĩkĩ yurabu parãkanikiki. ¹¹Hatu yusĩ pewabumabia hatũ mabu biã xaranũ ika peiwẽ kemukĩ hiwe anua yura betsa hawenabuya hatu xinã betsa wamakĩ hatu parãbiabu hatu nĩkakanikiki. Haskawẽ taeshũ mekenikabũ mibetã yusĩkĩ hau hatu nemakubainũbũwẽ.

¹²Hatunabu betsa unãnepatũ hatukiri kenekĩ yuikĩ: “Creta anua enaburã, habunã, hawara akamabia hamẽ kemutapai txani txakamisbu inũ, pubẽ bestibu inũ, pikebu inũ, hawa dayama txikixmisbuki”, anirã, ¹³txanima hatukiri yuikĩ aniki. Haskawẽ taeshũ hãtxa kuxipawẽ Creta anuabu nemakĩ hatu shabakabi unãmakĩ hatu kũyã akubaĩkãwẽ. Mã hatu haska waya ana hamapai tibikiri nĩkakĩ xinãma Jesus Cristokiri ikũwãkĩ pe besti xinãtirubuki, ¹⁴judeubũ beya miyui abubiamisbu natiã ana haska xinãma danaĩ ana yusĩa kayabiki petxitirubumakirã.

¹⁵Eskakiri mĩ hatukiri xinãkubainũ mia yuinũ nĩkawe. Hawara uke merã xinã pepa tsuabura haya ha meranua xinã pepas kaĩmakĩ pepakiri xinãmisbuki. Hamẽ habũ Jesus Cristo ikũwãbumarã, uke merã pepa besti hayama xinã txakaburi haya uĩtxakatirubuki, hatũ huĩti meranua txakabu haya kaĩmaiburã. ¹⁶Haskawẽ taeshũ habũ yuikĩ: “Deus ẽ ikũwaiĩ”, ibiakĩ hamapai txakabu betsa betsapa akĩ Deusũ haska abumis akama danãmisbuki. Habunã, eska tibi wakinã, hatuki sinatakĩ tsua abuama inũ, huĩti kuxi sinarãwã hawa hatũ xinã pepamawẽ taeshũ hawara pepa wakĩ Deus ashũtirubumaki.

Hãtxa pewẽ yusĩkĩ hatu merabewakĩ pewatikiaki, na hãtxarã

2 ¹Mianã, hawara mĩ hatu yuikatsis ikairã, na ẽ mia yuiã keska wakĩ habias Deusũ hãtxa kayabi pepawẽ hatu yusĩkubaĩwẽ. ²Huni ewabu hatu merabewakatsis ikĩ yusĩkĩ, hau parananãma hãtxa kayabi besti yuikubainũbũ, inũ hatũ hiwea pe hau mekenũbũ, inũ hau hatũ xinã pe mekeriakubainũbũ inũ, Jesus Cristokiri nĩkatã hau txibã pewanũbũ inũ,

nui hau abunamenübū inū, hawara bika betsa betsapa mei hau kuxipakī binukubainübū haskakiri hatu yuikubaīwē.

³Aību ewabu hatu merabewakatsi yusīkī habiaskari hatu akubaīwē. Hatū hiweawē pe hiwekī Deuskiri hau pe xinānübū inū, hau ana yuānanāyamanübū inū, hau ana paēyamanübū inū, haska Deusū abumis hawē hiweawēri hau dasibibu uīmakubainübū hatu yuikubaīwē.

⁴Haska wakī txipax beneyabu yusīkī hau hawē bene abunübū inū hau hawē bakeburi abukī duawakubainübū hatu unāmākī hatu yusīkubaīwē. ⁵Ha inū, hau tsua Deusū hātxaki hātxa txakabuyamanübū hatu yusīkī haska hatū xinā pe meketirubukiri inū, ibubis hatū yura pe meketirubukiri inū, hatunabu inū hatū mabu tibi hiwe anu pe dayakī meketirubu inū, hawara pepabu abutirubu inū, hatū benebe hātxawē binunametirubuma txipaxbu yusīkī mī hatu unāmaritiruki.

⁶Ha huni ewabu inū berunābu hau hatū xinā pe mekekubainübū ⁷miāri mī hiweawē mī ikai keskai dasibibu hau pepa irianübū hatu yusīkinā, hawa tsua beparanāma inū, tatimama pe bestikī hatu ishūkī uīmakubaīwē. ⁸Tsuabura nukū yusīaki ha ikaiabu hatu dakewakī hau ana nukukiri hawa txakabu yuiyamanübū hātxa pekiri besti yui nemakanātikiri besti hatu yuikubaīwē.

⁹Ha dikabi escravo dayarubū hau hatū tsumapā hātxa nīkatā hau txibākubainübū hatu yusīriashūkubaīwē, hau duapakī hatū tsumabu benimawakī hatube hātxa kenameama inū ¹⁰yumetsuama inū, hau hawa hatu parāma dasibi hatu ashūkubainūbunā. Hatu haska wamakī nukū mekenā Deusū hātxakiri dasibi pepa atikiri hatu uīmashūkī hatū tsumabu mī hatu abumatiruki.

¹¹Deusū yurabu mai hirabi anua hawē duapawē hawē pashati Jesus Cristo hatu unāmākī bitirubu inū biturubuma hatu shabakabi tashnimashuniki. ¹²Haska Deus nukuwē nuikī pashati nuku unāmākī yusīainā, hawē txakabu atimapa tibi inū hawē kemuti tibi na mai anushū nū amis hawē kuxipa pepawē nū txitetirubuki, natiā hiwea bena besti wē hiwekatsis ikī hawa ana xinā txakabu wē xināma pe besti akī haska Deusū nuku hiwemakatsi ikai hawē pepati akirā. ¹³Haska hiwekūkaikī nukū Deus binua inū nukū mekenā pepa kuxipa Jesus Cristo shanē ibuhairai ana nuku txītūshūkirāshanai manai nū benimaii. ¹⁴Deusū nuku kupiaya hau nukū txakabu wē taea nū benuyamashanübū dasibi txakabu ana xinātima wakī Deusū nuku buashunū, iwanā, Jesus Cristo yunua hamebi mawakī hawē hiwea nuku inai nuku mawashuniki. Nuku haska wakī hawenabu kayabi pepa nuku waniwē taeshū ha besti hiweshūkī nukū pepa uīmai dayashūkubainākwē.

¹⁵Hatu yusīkinā, kuxipai mestenepatā na hātxa ē mia yusīaīwē hatu benimawakī nemakī hatu pewakubaīwē, hau tsuā mia danākī itxakawayamanunā.

Jesus Cristo ikūwai haskai hiwekūkaītikiaki, na hātcharā

3 ¹Ikūwaiibu hau eskakubainūbū ē mia hatukiri xināmai. Habū mae yunuaibu shanē ibubū hatu hawakirira yunuabu hatu nīkatā hau ashūkubainūbūwē. Hawa txikixama hamapai tibi hatu yunuabu: “Hamaki”, ikama hau ashūkubainūbūwē. ²Tsuakira hātcha txakabukī hau yuiyamakubainūbūwē. Ha inū, duapa besti inū pepahaira bestikinā, hatuwē nuikī huīti babutā dasibibu hatu haibuwakī hau hatu uīmakubainūbūwē.

³Nukurā, habiaskari hatu itsari nukū xinā betsa wariama hiweshū Deus txibā pewama benua keska nishū hamapai betsa betsapa mei kemui txakabū dayarui nū mapupaunibuki. Haskai hiwea txakabui betsa hawara haya uī haska hayatima hawē kemui hatuki sinatai inū abunameama hatu danaī inū betsabube danānanaīnā. ⁴Hakia hanushū nukū mekenā Deus dasibi mai anuabu nukuwē nuikī nuku abukī hawē pepa nuku unāmaniki. ⁵Nukubū hawa wakī nū peshunamabia hawē nui pepas hawa husiamawē nuku mekekī piskumaniki, nukū txakabu txuka keska wakī. Nuku ana kaī bena wakī hawē hiwea bena nuku ināniki, hawē Yushī Pepawenā. ⁶Nukū mekenā Jesus Cristō hawē pepa hawa yauxiama hawē Yushī Papatū kuxipa nukuki dasiwaniki. ⁷Nukūmebi nū Deus hawa pepa ashūtirumabiakē duapa nukuwē nuikī nukū txakabu nuku buashūtā hawē pepawē hawē hiwekuīti nū bishanai nū hawē manakanū hawē Yushī Pepa nukuki dasiwaniki.

⁸Na haskakiri yusīanā, txanima kayabiki. Henekī betsa wama hakiri hatu yusīkubaīwē, habū Deus ikūwaiibu duapai hau hawēri hamapai pepa akubainūbunā. Na hātcha haska tibiwenā, haska hayatā dasibibube pepatirubuki. ⁹Hakia Deusū Moisés yusīmaniwē taea hawē yunuti inū hawē nemati inū hatū shenipabukiri hātchai judeubu sinatai kenamei tsua merabewatirumabia ha iki kūyā ikaibube hatube kenamei haskayamakūkaīwē, mia nīkabumakenā.

¹⁰Tsuāra Jesus Cristo ikūwaiibu hatu itimaska wakī hatu pashkakatsi ikaibu merabewanū, iwanā, kenatā mī yuia nīkamakē ana ha katxu kenatā mī yuia nīkamarikē hanushū hau ana matube itxayamashanū nematā hatu nitxiwē. ¹¹Ha yurabunā, hamapai txakabu wakī hawē huīti merāshū ana Deus nīkabuma ibubis hamebi hatū txakabuwē Deus ma kupimaikiki.

Tito dayaikiri kenekī keyunikiaki, na hātcharā

¹²Uīa, niwehairaitiā Nicópolis anu ē hiweyushanai. Mī dayai anu Ártemas kasmai Tíquico ē yunua mia anu kaya hanu hawairakirā Nicópolis anu eki nukui hushāwē. ¹³Nukū haibu Zenasī governo yunuti inū hawē nemati unāhairai inū yusīnā Apolo mia anu kai hikixina

hanua kaya hau bui nuitapayamanūbū ana hatū hamapai ikūwaību
hatu ināmakī hatu merabewamashāwē, hau haya butanūbunā.

¹⁴Mī hatu haska wamaiwē taeshū nukunabūri tapītirubuki, hatū
hiweawē pe merabenameti xara hatu uīmakī Deus dayashunaibu hatu
merabewatirubuki, hatū hiwea pekiri hatu xināmakinā.

¹⁵Dasibi nenu ebe ikabū hatū hātxa mia bumakanikiki. Hari mibe
iriabu anu nukū haibu nukubetā ikūwaību nuikī nū hatu abuai
nukū hātxa nū hatu bumariai. Deusū hawē pepawē hau matu dasibi
duawakubainūwē.

Hatiski, ē hātcharā.

Paulo